



20pt





g. de Brives

may 1617.

DECLARATION

DV ROY, EN FAVEUR
des Princes, Ducs, Pairs, Officiers
de la Couronne, Seigneurs, Gentils-
hommes & autres qui s'estoient
esloignez de sa Majesté.

Publiée en Parlement le 12. May, 1617.



A PARIS,
Par FED. MOREL, & P. METTAYER,
Imprimeurs ordinaires du Roy.

M. DC. XVII.

Avec Privilege de sa Maicsté.

X

Case

F

39

326

1617 f5d

THE NEWBERRY
LIBRARY



OVIS par la grace
de Dieu , Roy de
France & de Nauarre,
A tous presens & à
venir, Salut. La prom-

pte obeïssance qu'ont rendu à nos
commandemens depuis la Mort du
Mareschal d'Ancre, les Princes, Ducs,
Pairs, Officiers de nostre Couronne,
Seigneurs, Gentilshommes, Officiers
de nos Cours souueraines , & tous
ceux qui les auoient assiste, contre
lesquels nous auions decerné nos
lettres Patentes des mois de Ianuier
& Feurier derniers , nous a faict
assez cognoistre que le seul desir de

A ij

leur conseruation , & d'empescher la ruine qui leur estoit procuree par les insolens , violens & pernicious desseins dudit Marechal d'Ancre, les auoit contrains à s'esloigner de nous, & chercher leur seureté dans les armes, bien qu'illicites, d'autant que ledit Marechal se seruoit, contre nostre intention , de nos forces pour les opprimer. Mais comme il a esté de nostre dignité de decerner nos lettres de Declaration à l'encontre d'eux, lors qu'ils commettoient des actions contraires à leur deuoir , au lieu d'attendre iustice de nous : Maintenant que nous sommes asseurez de leur fidelité, & qu'ils nous ont faict recognoistre que la seule necessité de leur conseruation , les auoit portez à s'associer seulement pour s'opposer aux violences dudit Marechal : Et que nous auons esté suffi-

samment informez de leur part , de
 leurs bonnes intentions enuers Nous
 & nostre Royaume, & du desir qu'ils
 ont d'employer leurs vies pour en
 accroistre la grandeur , & mainte-
 nir Nous & nostre autorité : Et
 qu'ils sont grandement desplaisans
 d'auoir leué des gens de guerre , ar-
 resté & prins nos deniers : imposé
 sur nostre peuple des contributions,
 & faict trauailler aux fortifications
 des places qu'ils tenoient, nos subjets
 à coruees : Ce qu'ils nous ont prote-
 sté qu'ils n'eussent iamais entrepris,
 & moins de faire entrer des estran-
 gers dans nostre Royaume, s'ils n'y
 eussent esté contraints pour euitier
 la ruine & desolation entiere d'eux
 & de leurs familles : Il est de nostre
 clemence & Royale bonté , en les
 traictant fauorablement , de leur
 pardonner les fautes qu'ils peuuent

en cela auoir commises , & de les
 reftablir dans les charges , honneurs
 & dignitez qu'ils poffedoient aupar-
 auant : puis que d'ailleurs cela peut
 feruir pour affermir en nostre Roy-
 aume la paix tant neceffaire & de-
 firee des gens de bien . C'eft pour-
 quoy apres auoir mis cet affaire en
 deliberation en nostre Conseil où
 eftoient aucuns Princes de nostre
 fang , autres Princes , Ducs , Pairs,
 Officiers de nostre Couronne , &
 principaux de noutredit Conseil,
 Sçauoir faisons que de l'aduis d'ice-
 luy , & de nostre certaine fcience,
 pleine puiffance & autorité Roya-
 le, Nous auons dit & déclaré, difons
 & declarons par ces presentes fignées
 de nostre main , Que nous tenons les-
 dits Princes, Ducs , Pairs, Officiers de
 nostre Couronne , & tous ceux qui
 les ont affistez , pour nos bons &

loyaux subjets & seruiteurs : Vou-
lons & entendons la memoire de
tout ce qui est arriué en ces derniers
mouuemens pour les faicts cy des-
sus specifiez , & autres concernans
ladite leuee d'armes , & actes d'ho-
stilité, demetir du tout esteinte &
abolie; comme nous l'esteignons &
abolissons par celsdites presentes : à
la charge que à l'aduenir ils se con-
tiendront dans les bornes du respect
qu'ils nous doiuent , & rendront
l'obeissance qu'ils sont tenus à nos
commandemens: Et que dès à pre-
sent ils renonceront à toutes ligues
& associations qu'ils peuuent auoir
faictes entr'eux & autres nos subjets
ou estrangers, tant dedans que hors
le Royaume, de quelque condition
qu'ils puissent estre : & generale-
ment s'acquitteront du deuoir de
bons & fidels subjets & seruiteurs,

à quoy leur naissance les oblige : & moyennant ce , nous les auons reſtablis & reſtabliſſons en tous & chascuns leurs biens , meubles & immeubles , honneurs , dignitez , charges , eſtats , offices & penſions , deſquels nous leur donnons pleine & entiere main-leuee , leuons & oſtons à ceſte fin toutes faiſies ſur iceux. Voulons & entendons qu'ils iouyſſent de nos graces , faueurs , bienfaits , honneurs & gouuernemens ; & exercent leurs charges & offices , ainſi qu'ils faiſoient auparauant , ſans qu'ores & à l'aduenir ils y puiſſent eſtre troublez ny empeschez en quelque ſorte & maniere que ce ſoit : Impoſant ſur ce ſilence à nos Procureurs Generaux , leurs Subſtituts preſens & à venir , & tous autres : nonobſtant toutes Declarations , interdictions , & autres lettres patentes qui ont eſté cy-deuant
par nous

par nous decernees & publiees en nos Parlemens au contraire. Lesquelles nous auons reuoquees & reuoquós, declarees & declarons nulles & de nul effect & valeur, & tout ce qui s'est faict en execution d'icelles: lesquelles pour cét effect de nostre grace speciale, nous voulons estre ostees & tirees des Registres de nos Cours de Parlemens. Tenons en outre quittes & deschargez ceux qu'ils ont commis aux maniemens de nos deniers & autres qu'ils pourroient auoir imposez & actuellement touchez, pourueu que dans six semaines apres la publication des presentes ils rapportent en nostre Chábre des Comptes double de leurs estats, arrestez & signez par l'un desdits Princes & Ducs: & pareillement des bois qu'ils peuuent auoir coupez & enleuez de nos Forests. Voulons aussi que nos Edicts & De-

clarations cy-deuant faicts pour la
 Pacification des troubles de nostre
 Royaume, mesmes celuy de Blois
 en suite & consequence du Traicté
 de Lodun, soient inuiolablement e-
 xecutez, gardez & obseruez de poinct
 en poinct selon leur forme & teneur,
 & que sous l'auctorité & benefices
 d'iceux, tous nos subiets tât Catholi-
 ques que de la Religion pretenduë re-
 formee, viuent desormais en bonne
 paix, vnion & intelligence sous no-
 stre obeyssance, sans qu'ils se fassent
 les vns aux autres aucuns reproches
 pour raison des choses passees. **SI**
DONNONS EN MANDEMENT
 à nos amez & feaux Conseillers les
 gens tenans nos Cours de Parlemens,
 Chambres de nos Comptes, Baillifs,
 Seneschaux, Iuges ou leurs Lieute-
 nans, & à tous nos autres Iusticiers &
 Officiers qu'il appartiendra chacun

endroit soy, que ces presentes ils ver-
rifient, & facent lire, publier, garder &
obseruer selon leur forme & teneur.
Et afin que ce soit chose ferme & sta-
ble à tousiours, Nous auons fait met-
tre nostre seal à cesdictes presentes.
CAR tel est nostre plaisir. Donné au
Bois de Vincennes au mois de May,
l'an de grace, mil six cens dixsept. Et
de nostre Regne le septiesme.

Signé, LOVYS.

Et sur le reply, Par le Roy,

DE LOMENIE.

Et à costé est escrit, VISA.

Et seellé du grand seal de cire verte
sur lacs de soye rouge & verte.

B ij

Leuës, publiées & Registrées, ouy &
ce requérant le Procureur General du Roy,
ordonne que coppies collationnees seront
enuoyees aux Bailliages & Seneschauſſées,
pour y estre leuës, publiees & registrees à la
diligence des Substituds dudit Procureur
General, qui la certifieront auoir ce faict au
mois, à peine d'en respondre en leur nom. A
Paris en Parlement, le douZiesme May,
mil six cens dix-sept.

Signé, DV TILLET.





